



Fasnacht 2003

## Basler Bebbi Basel Alti Garde

# Dert äne am Bärgli...

## Armee-Tourismus in de Schwyzer Alpe

Dr erschti Fasnachtszeedel zem Mitsinge.

**Dert äne am Bärgli, dert iebt s Militär,  
sy reede e bitz Änglisch und dr Chef haisst Tony Bläär.**  
Holladuuli duliduuli holladuliduliduliduuli holladuuli duliduuli holladuliduliduliooo.

Die britisch Armee, die het über d Nacht  
zmittzt uf dr Jungfrau e Armeeschützpunktungt gmacht.  
Dert äne am Bärgli wird kriegsmässig trimmt,  
s luege alli uf d Syte ... denn d Kasse, die schimmt.

**S het Sennerinne und Maiteli, die renne ummenand,  
sy schmuuse mit de Brite und mache die hohli Hand.**  
Holladuuli duliduuli holladuliduliduliduuli holladuuli duliduuli holladuliduliduliooo.

Us Grindelwald sait s Öschters Hanni:  
Make love not war and gimmer money.  
S Heidi sait zem Gaisepeter:  
Hallo Pete I see you later,  
e näte Flirt, e paar änglisch Schmützli,  
und für alles das grieg y änglisch Schützli.  
Us jedem Hüttli am glainschte Hübeli  
mache sy e Soldateschübeli.  
Dä Schützpunktungt, dä duet d Gyrr entfache,  
denn dasch dr Punggt, wo d Schütz kasch mache.  
So würde d Neutraliteetsverbieger  
ze Hälfer und ze Passivkrieger.

**Und d Schwyzer Politiker, die wänn ihri Rueh,  
sy drugge drum d Ohre und baidi Auge zue.**  
Holladuuli duliduuli holladuliduliduliduuli holladuuli duliduuli holladuliduliduliooo.

Dr Couchebin findet: Laissez faire,  
faites comme vous voulez, s'il vous Blair.  
Non, pas chez nous, sait d Frau Calmy-Rey,  
ils font des manoeuvre, je le sais.  
Beflisse iversetzt dr Deiss:  
Je le sais, das haisst, ych waiss.  
Manöver? Do schtuunt s Metzler-Schätzi:  
ych bi halt jung und gnau so schwätz y.  
Dr Leuebärger schtoht ins zwatti Gliid  
und verschteggt sich hinterem Samuel Schmid.  
Sogar im Villiger wirds zvyl  
är zieht nervös am Villiger Kiel.  
Drum hän die siibe Zwärgli bschlosse:  
Dert äne am Bärgli würde d Auæ aschlosse.

**Dert äne am Bärgli, dert iebe bis dato  
ebbe hundert Armee'e, s gheere alli zer Nato.**  
Holladuuli duliduuli holladuliduliduliduuli holladuuli duliduuli holladuliduliduliooo.

Sy iebe im Schnee am laufende Band  
und träume vom warme Wieschtesand.  
Dä Drill im Schnee isch ussergewehnlig  
s maint jede, är sygi dr Yeti perseenlig.  
E Schneemaa sait pletzlig: How do you do,  
my name is Bush, George Dabbel-Juu,  
und s Kriegerle, das isch my Hobby,  
das finanziert mir d Waffelobby.

My gröschts Probleem, das wird ych löose,  
das isch die Achse vo däm Bööse.  
S git gueti und s git böösi Mächt,  
guet bi ych, dr Räschts isch schlächt.  
Wär ihm nit passt, dä knallt är zämme,  
und s wyssi Huus wird rot vom Schämme.

**By sonere infantile idiotische Laischtig  
wird dr Bush halt zem Busheli, asso mindeschens gaischtig**  
Holladuuli duliduuli holladuliduliduliduuli holladuuli duliduuli holladuliduliduliooo.

Grad nääbe dra, mir platzt dr Kraage,  
heersch dr Sharon Shalom saage.  
Shalom haisst Friide, do muess me sich fiege,  
doch sait dr Sharon aim Shalom, denn duet är liege.  
Dä redet vo Verluscht, dä redet vo Gwinn,  
ind vergisst drby, ass es Mensche sin.

**Dr militärischi Tourismus entwigglet sich gly  
zem multikulti Alpe-Manöver-Jekami.**  
Holladuuli duliduuli holladuliduliduliduuli holladuuli duliduuli holladuliduliduliooo.

Dr Major Bill het uf synere Batte  
e Foti vo dr Schynige Platte.  
S sait ain vo dr légion étrangère:  
Gott grüss die deutsche Bundeswehr.

Dr Stoiber schreyt: In Oberbayern  
könnnt man auch Manöver feiern.  
Als Antwort sait dr Gerhard Schrööder:  
Ych bi zweor dr schööner, drfir bisch du blööder.

E änglisch Usgoob vom Lütnand Blunschli  
suecht verbisse e Sennetunschli.

E Russ sait ze sym russische Briderchen:  
komm wir singen Schweizer Liederchen,  
dr kosmopolitischi Alpe-Hit:

Es Tschetschenie-Biebli many nit.

Uf dr Jungfrau zimmlig unde  
haig aine s Vogellysi gfunde,  
dä gröölt drum in de heggachte Töön  
s Bärneroberland, das syg denn schöön.

Ain vom Tessin luegt d Eigerwand aa  
und singt denn frehlig la banda, la banda.

Wäge dr Röschtigraabe-Kampagne  
singt ain là haut sur la montagne.

Schtatt mälche, choche, mischte, chääse,  
geh d Maitli diräggts ans Hauptverlääse,

me suecht e Plätzli, meeglisch schattig,  
fir alli Art vo Truppegattig.

Denn noch em HaVau sin d Brite gfellig  
und präsentiere d Achtingschellig.  
Gschtresst sait s Anneröös vo Thun:

y maa nümm, gib ändlig 'Ruhn'.

Posthum befördere sy dr Wilhelm Tell

zem Apple-Shooter-Colonel.

Dr Ueli Muurer lächlet froh,  
oder ischs ägscht doch dr Giacobo?

Do, e türkische Panzer, sehsch en picobello,  
a nai, s isch d Frau Yakin uf em Dreyradvelo.

Drnääbe singt im Oobeschyy

dr Captain John: God save the Queen,

und uf dr Jungfrau wajht, o lägg,

am Fahnemascht dr Union Jack.

Ganz lyyslig summt dr Tony Blair

trittst im Morgenrot daher,

und dytlig hallts vo de Gletscherwänd:

God save the Bärner Oberländ

**Dert äne am Bärgli wird Kriegerlis gmacht  
und mir alte Bebbi saage numme no guet Nacht.**

**Am Daag do schynt d Sunne und znacht schtrahle d Schärne  
und am Zyschtig bym Münschter, do zaige mr d Ladärne.**  
Holladuuli duliduuli holladuliduliduliduuli holladuuli duliduuli holladuliduliduliooo

Druck: Thoma AG, Basel